



草木典第七卷

木部紀事

路史辰放氏古初之人卉服蔽體辰放氏作乃教民擇木茹皮以禦風霜

有巢氏太古之民穴居而野處搏生而咀華有聖者作棲木而巢教之巢居以避之號有巢氏其爲民也登巢椽蠶情食鳥獸之肉若不能餽者飲其血嘬其膈茹其皮毛未有火化捆椽栗以爲食草棲木末令之曰有巢氏之民先是時民稔血食而有爭心有剝林木而戰者矣勝者以見長不足蒞之則就其無欲者而聽令焉又不足定之於是刻木結繩以爲政木皮未委于復塞其羽革紩衣攀領著兜冒以賁體

燧人氏不周之巔有宜城焉日月之所不屆而無四時昏晝之辨有聖人者游於日月之都至於南垂有木焉鳥啄其枝則燐然火出聖人感之於是仰察辰心取以出火作鑽燧別五木以改火  
柏皇氏以木紀德

軒轅氏見轉風之蓬不已於是作制乘車栲輪機較橫木爲轅直木爲軒故號曰軒轅氏

昊英之世以伐木與殺獸人民少而木獸衆

有巢氏昔在上世人固多難有聖人者教之巢居冬則營窟夏則居曾巢號曰有巢氏木處顛風生燥顛傷燥天於是有聖人焉教之編槿而廬緝繯而扉垣塗茨翳以違其高卑之患故亦號有巢氏太昊伏羲氏肇修文教爲百王典以其載德自木木實麗東道不可尙同乎元氣是稱太昊木盛於卯以卯之辰陞敷教之臺

女皇氏承庖制度襲木勝主於東方

炎帝神農氏謂木器液金器腥於是大埏埴以爲器而人壽謂人之生穀爲主於是斲木爲耜揉木爲耒而戒之耕

帝嚳高辛氏以木紀德

書經禹貢禹敷土隨山刊木

括地象羿五歲父母與之入山處之木下以待蟬鳴還欲取之而羣蟬俱鳴遂捐而去羿爲山間所養年二十習于弓矢

書經金縢武王既喪管叔及其羣弟乃流言于國曰公將不利于孺子周公乃告二公曰我之弗辟我無以告我先王周公居東二年則罪人斯得于後公乃爲詩以貽王名之曰鷓鴣王亦未敢謂公秋大熟未穫天大雷電以風禾盡偃大木斯拔邦人大恐王與大夫盡弁以啟金縢之書乃得周公所自以爲功代武王之說二公及王乃問諸史與百執事對曰信噫公命我勿敢言王執書以泣曰其勿繆卜昔公勤勞王家惟予冲人弗及知今天動威以彰周公之德惟朕小子其新逆我國家禮亦宜之王出郊天乃雨反風禾則盡起二公命邦人凡大木所偃盡起而築之歲則大熟

列子夸父追日道死棄其杖生鄧林彌廣數千里

管子輕重丁篇桓公曰五衢之民衰然多衣弊而履穿寡人欲使帛布絲纊之賈賤爲之有道乎管子曰請以令沐途旁之樹枝使無尺寸之陰桓公曰諾行令未能一歲五衢之民皆多衣帛完屨桓公召管子而問曰此其何故也管子對曰途旁之樹未沐之時五衢之民男女相好往來之市者罷市相睹樹下談語終日不歸男女當壯扶輦推輿相睹樹下戲笑超距終日不歸父兄相睹樹下論議元語終日不歸是以田不發五穀不播麻麥不種蠶繅不治內嚴一家而三不歸則帛布絲纊之

賈安得不貴桓公曰善

輕重戊篇桓公問於管子曰萊莒與柴田相并爲之奈何管子對曰萊莒之山生柴君其率白徒之卒鑄莊山之金以爲幣重萊之柴賈萊君聞之告左右曰金幣者人之所重也柴者吾國之奇出也以吾國之奇出盡齊之重寶則齊可并也萊卽釋其耕農而治柴管子卽令隰朋反農二年桓公止柴萊莒之糴三百七十齊糴十錢萊莒之民降齊者十分之七二十八月萊莒之君請服

左傳僖公二十三年晉公子重耳之及于難也奔狄狄人伐唐咎如獲其二女叔隗季隗納諸公子公子取季隗以叔隗妻趙衰將適齊謂季隗曰待我二十五年不來而後嫁對曰我二十五年矣又如如是而嫁則就木焉請待子 二十八年晉侯次於城濮晉車七百乘鞬韞鞅鞞晉侯登有莘之

虛以觀師曰少長有禮其可用也遂伐其木以益其兵 三十二年穆公召孟明西乞白乙使出

師於東門之外蹇叔哭之曰孟子吾見師之出而不見其入也公使謂之曰爾何知中壽爾墓之木拱矣

成公二年齊頃公與晉卻克戰於鞌齊師敗績逐之三周華不注逢丑父與公易位將及華泉驂絙

於木而止

昭公十六年九月大雩旱也鄭大旱使屠擊祝款豎柎有事於桑山斬其木不雨子產曰有事於山  
藪山林也而斬其木其罪大矣奪之官邑

韓宣子宴於季氏有嘉樹焉宣子譽之武子曰敢不

封植此樹

禮記檀弓孔子之故人曰原壤其母死夫子助之沐椁原壤登木曰久矣予之不托于音也歌曰狸  
首之斑然執女手之卷然

家語季康子問於孔子曰舊聞五帝之名而不知其實請問何謂五帝孔子曰昔丘也問諸老聃曰  
天有五行水火金木土分時化育以成萬物其神謂之五帝古之王者易代而改號取法五行五行  
更王終始相生亦象其義故其生爲明王者死而配五行是以太皞配木炎帝配火黃帝配土少皞  
配金顓頊配水康子曰太皞其始之木何如孔子曰五行用事先起於木木東方萬物之初皆出焉  
是故王者則之而首以木德王天下其次則以所生之行轉相承也

莊子孔子窮于陳蔡之間七日不火食左據槁木右擊槁枝而歌焱氏之風

賈子說林公良孺多力仲尼爲桓魋伐其所庇大木仲尼將行公良孺怒拔其根立木而去明日魋視之木更生根活矣

禮記檀弓孔子早作負手曳杖消搖于門歌曰泰山其頽乎梁木其壞乎哲人其萎乎

孔叢子夫子墳方一里弟子各以四方奇木來植之

吳越春秋越王請大夫種而問曰吾昔日受夫子之言自免於窮厄之地今欲奉不羈之計以雪吾之宿讎何行而功乎大夫種曰吳王好起宮室用工不輟王選名山神材奉而獻之越王乃使木工千有餘人入山伐木一年師無所幸作士思歸皆有怨望之心而歌木客之吟一夜天生神木一雙大二十圍長五十尋陽爲文梓陰爲榿榘巧工施校制以規繩雕治圓轉刻削磨礪分以丹青錯畫文章嬰以白璧鏤以黃金狀類龍蛇文彩生光乃使大夫種獻之於吳王曰東海役臣臣孤句踐使臣種敢因下吏聞於左右賴大王之力竊爲小殿有餘材謹再拜獻之吳王大悅子胥諫曰王勿受也昔者桀起靈臺紂起鹿臺陰陽不和寒暑不時五穀不熟天與其災民虛國變遂取滅亡大王受之必爲越王所戮吳王不聽遂受而起姑蘇之臺三年聚材五年乃成高見二百里行路之人道死

巷哭不絕嗟嘻之聲民疲士苦人不聊生

莊子南郭子綦遊乎商之丘見大木焉有異結駟千乘隱將庇其所竊子綦曰此何木也然必異材從而視其細枝則拳曲而不可以爲棟梁俯而視其木根則軸解不可以爲棺槨舐其葉則舌爛嗅之則使人狂子綦曰此果不材之木以至於此其大也 莊子行於山中見大木枝葉盛採木者

止其旁而不取也問其故曰無所可用莊子曰此木以不材終其天年矣

史記商君傳鞅定變法之令令既具未布恐民之不信己乃立三丈之木於國都市南門募民有能徙置北門者予十金民怪之莫敢徙復曰能徙者予五十金有一人徙之輒予五十金以明不欺卒下令令行於民

淮南子人間訓解扁爲東封

解扁魏臣治東封者

上計而入三倍有司請賞之文侯曰吾土地非益廣也人民

非益衆也入何以三倍對曰以冬伐木而積之於春浮之河而鬻之文侯曰民春以力耕暑以強耘秋以收斂冬閒無事以伐林而積之負輓而浮之河是用民不得休息也民以敝矣雖有三倍之入將焉用之

宋拾遺錄蘇秦張儀二人假食於路剝樹皮爲囊以盛天下良書

韓非子說林篇隰斯彌見田成子田成子與登臺四望三面皆囑南望隰子家之樹蔽之田成子忝不言隰子歸使人伐之斧離數創隰子止之其相室曰何變之數也隰子曰古者有諺曰知淵中之魚者不祥夫田子將有事事大而我示之知微我必危矣不伐樹未有罪也知人之所不言其罪大矣乃不伐也

外儲說左篇墨子爲木鳶三年而成蜚一日而敗弟子曰先生之巧至能使木鳶飛墨子曰我不如爲車輓者巧也用咫尺之木不費一朝之事而引三十石之任致遠力多久於歲數今我爲鳶三年成蜚一日而敗惠子聞之曰墨子大巧巧爲輓拙爲鳶

西京雜記初修上林苑羣臣遠方各獻名果異樹亦有製爲美名以標奇麗梨十紫梨青梨實大芳梨實小大谷梨細葉梨縹葉梨金葉梨出瑯琊王野家太守王唐所獻瀚海梨出瀚海北耐寒不枯東王梨出海中紫條梨棗七弱枝棗玉門棗棠棗青華棗楞棗赤心棗西王棗出崑崙山栗四侯栗榛栗瑰栗嶧陽栗嶧陽都尉曹龍所獻大如拳桃十秦桃橈桃細核桃金城桃綺葉桃紫紋桃霜桃

霜下可食胡桃出西域櫻桃含桃李十五紫李綠李朱李黃李青綺李青房李同心李車下李含枝  
李金枝李顏淵李出魯羌李燕李蠻李侯李柰三白柰紫柰花紫色綠柰花綠色查三蠻查羌查猴  
查棹三青棹赤葉棹烏棹棠四赤棠白棠青棠沙棠梅七朱梅紫葉梅紫花梅同心梅麗枝梅燕梅  
猴梅杏二文杏材有文采蓬萊杏東郭都尉于吉所獻一株花雜五色六出云是仙人所食桐三椅  
桐梧桐荆桐林檎十株枇杷十株橙十株安石榴十株棹一株白銀樹十株黃銀樹十株槐六百四  
十株千年長生樹十株萬年長生樹十株扶老木十株守宮槐十株金明樹二十株搖風樹十株鳴  
風樹十株琉璃樹七株池離樹十株離婁樹十株白俞榴杜榴桂蜀漆樹十株枹四株椈七株栝十  
株楔四株楓四株余就上林令虞淵得朝臣所上草木名二千餘種鄉人石瓊就余求借一皆遺棄  
今以所記憶列於篇右

魯恭王得文木一枚伐以爲器意甚玩之中山王爲賦曰麗木離披生  
彼高崖拂天河而布葉橫日路而摧枝幼雛羸毳羣雄寡雌紛紛紕翔集嘈噉嗚啼載重雪而稍勁風  
將等歲于二儀巧匠不識王子見知乃命班爾載斧伐斯隱若天崩豁如地裂花葉分披條枝摧折  
旣剝旣刊見其文章或如龍盤虎踞復似鸞集鳳翔青縞紫綬環璧珪璋重山累嶂連波疊浪奔電

屯雲薄霧濃零麝宗驥旅雞族雉羣蠋繡鸞錦蓮藻文色比金而有裕質參玉而無分制爲用器  
曲直舒卷修竹映池高松植獻制爲樂器婉轉蟠紆鳳將九子龍導五駒制爲屏風鬱鼎穹隆制爲  
杖几極麗窮美制爲枕案文章璀璨彪炳渙汗制爲盤盂采玩踟躕猗歟君子其樂只且恭王大悅  
顧盼而笑賜駿馬二疋

十洲記長洲一名青丘在南海辰巳之地地方各五千里去岸二十五萬里上饒山川及多大樹樹  
乃有二千園者一洲之上專是林木故一名青丘

神異傳南方有火山焉長四十里廣四五里其中皆生不燼之木

漢書終軍傳軍字子雲濟南人也少好學以辯博能屬文聞於郡中年十八選爲博士弟子至府受  
遣太守聞其有異才召見軍甚奇之與交結軍揖太守而去至長安上書言事武帝異其文拜軍爲  
謁者給事中從上幸雍祠五畤獲白麟一角而五蹄時又得奇木其枝旁出輒復合於木上上異此  
二物博謀羣臣軍上對曰臣聞詩頌君德樂舞后功異經而同指明盛德之所降也南越竄屏葭葦  
與鳥魚羣正朔不及其俗有司臨境而東甌內附閩王伏辜南越賴救北胡隨裔薦居上古未能攝

大將軍秉鉞單于奔幕票騎抗旌昆邪有衽是澤南洽而威北暢也若罰不阿近舉不遺遠設官煥  
賢縣賞待功能者進以保祿罷者退而勞力刑於宇內矣履衆美而不足懷聖明而不專建三宮之  
文質章厥職之所宜封禪之君無聞焉夫天命初定萬事草創及臻六合同風九州共貫必待明聖  
潤色祖業傳於無窮故周至成王然後制定而休徵之應見陛下盛日月之光垂聖思於勒成專神  
明之敬奉燔瘞於郊宮獻享之精交神積和之氣塞明而異獸來獲宜矣昔武王中流未濟白魚入  
於王舟俯取以燎羣公咸曰休哉有郊祀未見於神祇而獲獸以饋此天之所以示饗而上通之符  
合也宜因昭時今日改定告元苴以白茅於江淮發嘉號於營丘以應緝熙使著事者有紀焉蓋六  
鵠退飛逆也白魚登舟順也夫明闇之徵上亂飛鳥下動淵魚各以類推今野獸并角明同本也衆  
支內附示無外也若此之應殆將有解編髮削左衽襲冠帶要衣裳而蒙化者焉斯拱而竢之耳對  
奏上甚異之由是改元爲元狩後數月越地及匈奴名王有率衆來降者時皆以軍言爲中  
孔光傳光給事中沐日歸休兄弟婁子燕語終不及朝省政事或問光温室省中樹皆何木也光默  
不應更答以他語其不泄如是

五行志哀帝建平二年十月汝南西平遂陽鄉柱仆地生支如人形身青黃色而白頭有髭髮稍長大凡長六寸一分京房易傳曰王德衰下人將起則有木生爲人狀

哀帝建平三年零陵有樹僵地圍丈六尺長十丈七尺民斷其本長九尺餘皆枯三月樹卒自立故處京房易傳曰棄正作淫厥妖木斷自屬妃后有顓木仆反立斷枯復生天辟惡之

逸人傳丁蘭少喪考妣不及供養乃刻木爲人彷彿親形事之若生

後漢書馮異傳異爲人謙退不伐行與諸將相逢輒引軍避道每所止舍諸將並坐論功異常獨屏樹下軍中號曰大樹將軍

謝承後漢書方儲幼喪父母終日負土成墳種奇樹千株

宋書符瑞志漢章帝元和中木連理生郡國

安帝元初三年正月丁丑東平陵樹連理

漢安帝延光三年七月左馮翊有木連理

延光三年七月潁川定陵有木連理

漢桓帝建和二年七月河東有木連理

誠齋雜記鄭元師馬融三載無聞融遣還元過樹陰下假夢寐一人以刀開其心謂曰子可學矣於是寤而卽返遂洞精典籍

後漢書張讓傳讓等說帝令斂天下田畝稅十錢以修宮室發太原河東狄道諸郡材木及文石每州郡部送至京師黃門常侍輒令譴呵不中者因強折賤買十分顧一因復貨之於宦官復不爲卽受材木遂至腐積宮室連年不成

五行志中平中長安城西北六七里空樹中有人面牛鬣

烏桓傳其俗有勇健能理決鬪訟者推爲大人大人有所招呼則刻木爲信雖無文字而部衆不敢違犯

馬韓傳馬韓其人壯勇少年有築室作力者輒以繩貫脊皮縋以大木謹呼爲健

宋書符瑞志吳孫權黃武四年六月皖口言有木連理

魏文帝黃初初郡國二言木連理

魏略文帝嗣立爲魏王是歲天下奏醴泉涌木連理

水經注賀將軍討山賊多作勁木白楸選有力者捉楸擊賊

三吳記潘璋夫婦塚木交枝名並枕樹

太平廣記潘章少美容儀時人競慕之楚國王仲先聞其美名故來求爲友章許之因願同學一見相愛情若夫婦便同衾共枕交好無已後同死而家人哀之因合葬於羅浮山冢上忽生一樹柯條枝葉無不相抱時人異之號爲共枕樹

晉書五行志蜀劉禪景耀五年宮中大樹無故自折譙周憂之無所與言乃書柱曰衆而大其之會具而授若何復言曹者衆也魏者大也衆而大天下其當會也具而授如何復有立者乎蜀果亡如周言此草妖也

宋書符瑞志晉武帝泰始元年十二月木連理生遼東方城 泰始二年八月木連理生河南成

阜 泰始八年五月甲辰木連理生東平壽張十月木連理生建寧

晉武帝咸寧元年正月木連理生汝陰南頓 咸寧二年四月木連理生清和靈六月又生燕國

咸寧三年七月壬辰木連理生始平鄠 咸寧四年八月木連理生陳留長垣 咸寧五年木

連理生義陽木連理生樂安臨濟

晉武帝太康元年正月木連理生涪陵永平四月木連理生頓丘五月木連理二生濟陰乘氏沛國  
又七月木連理生馮翊粟邑 太康二年正月木連理生滎陽密十月木連理十三生南安源道

太康三年四月木連理生瑯琊華六月木連理生廣陵海西 太康四年正月木連理生馮翊臨

晉蜀郡成都十二月木連理生扶風 太康七年三月木連理生河南新安六月木連理生始興

中宿南鄉范陽 太康八年四月木連理生廬陵東昌九月木連理生東萊盧鄉 太康九年

九月木連理生陳留浚儀 太康十年十一月木連理生鄱陽鄒鄉

晉武帝太熙元年二月木連理生河南梁

晉惠帝元康元年五月木連理三生成都臨邛

晉愍帝建興二年三月庚辰木連理生朱提 建興二年三月木連理二生益州雙柏六月木連

理生襄平

晉元帝建武元年閏月乙丑木連理生嵩山八月甲午木連理生汝陰十一月木連理生武昌大將

軍王敦以聞十一月癸酉木連理生汝陰太守以聞

晉書輿服志司南車卽指南車刻木爲仙人衣羽衣立車上車雖回運而手常南指大駕出行爲先  
啟之乘

晉中興徵祥說王者德澤純洽八方同一則木連理連理者仁木也或異枝還合或兩樹共合建武  
元年木連理四一生膏山一生武昌一生汝陰一生汝陽泰興元年又生武昌

宋書符瑞志晉元帝太興元年七月戊辰木連理生武昌大將軍王敦以聞 太興三年十一月

木連理生零陵永昌

晉書五行志明帝太寧元年九月會稽剡縣木生如人面是後王敦稱兵作逆禍敗無成昔漢哀成  
之世並有此妖而人貌備具故其禍亦大今此但如人面而已故其變也輕矣

宋書符瑞志晉成帝咸和八年五月己巳木連理生昌黎咸和

咸康三年三月庚戌木連理生平州世子府治故園中 咸康七年十二月吳國內史王恬上言

木連理生吳縣沙里